



Han tut part al podium pel presidi cumünal da Val Müstair (da schnestra): Ils duos cuntracandidats Thomas Schadegg ed Ivo Lamprecht, il moderatur David Truttmann e la presidenta cumünala actuala Gabriella Binkert Becchetti. fotografia: Nicolo Bass

Chi surpiglia il timun in Val Müstair?

La Val Müstair tscherna quist’utuon las autoritats cumünalas pella prosma perioda d’uffizi 2025 fin 2028. In venderdi s’han preschantats tuot ils candidats pel presidi cumünal e per la suprastanza cumünala in occasiun d’ün podium a Sta. Maria.

NICOLÒ BASS

Als 22 settember elegian las votantas ed ils votants dal cumün da Val Müstair la presidenta o il president cumünal pels prossems quatter ons. A disposiziun pella reelecziun as metta la presidenta actuala Gabriella Binkert Becchetti. Concorrenza survain ella da duos candidats chi sun actualmaing commembers da la suprastanza cumünala, nempe dad Ivo Lamprecht e da Thomas Schadegg. In venderdi saira sun gnüts preschantats tuots trais candidats in occasiun d’üna discussiun da podi mode-

rada da David Truttmann, schefredacter da la FMR. L’occorrenza es gnüda organisada da Mia Val Müstair, üna società politicamaing e confessiunalmaing independenta, chi ha l’intent da promover ün svilup persistent per l’economia, la società, la cultura e la natura in Val Müstair. Üna tschientina da Jauras e Jauers han visità la discussiun al podi chi ha gnü lö illa sala polivalenta da la scoula a Sta. Maria.

Collavuraziun mangluossa
L’avegnir da la scoula a Sta. Maria respectivamaing il projet d’ingrondimaint da la scoula a Müstair es stat ün dals temas centrals da la discussiun. Oters temas importants sun stats la Chasa Plaz (l’anteriuor alberg da giuventüna) ed il sviamaint da Sta. Maria. I’l center da la discussiun a reguard quists trais temas nun es statta la dumanda per o cunter ils progets, dimpersè la strategia ed il tempo per realisar ils singuls progets. Intant cha Gabriella Binkert Becchetti voul gnir reeletta per cuntinuar culla via inchaminada, han ils duos cuntracandidats critichà la politica da comunicaziun e trasparenza

ed impustüt la collavuraziun actuala illa suprastanza cumünala. Quista malquietezza in suprastanza e la collavuraziun mangluossa es finalmaing stat il fil cotschen tras tuot la discussiun ed ha eir pisserà per emeziuns. Ils duos cuntracandidats as giavüschessan daplü fiduzcha e respunsabilità pels respunsabels dals singuls decasteris. La presidenta cumünala invezza es respunsabla pel persunal e las finanza ed ella as piglia eir il dovair da perseguitar e stumplar ingio chi fa dabsögn.

Evidaint es stat in venderdi saira, cha insembel nu funcziuna la collavuraziun. Perquai as retegnan ils duos cuntracandidats eir il dret, da ponderar tuot tenor il resultat da las elecziuns pel presidi cumünal, sch’els vöglian in seguit candidar eir amo üna vouta per la suprastanza cumünala o brich. L’elecziun da la suprastanza cumünala ha nempe lö in november, davo cha la presidenta o il president cumünal es gnü elet.

Tschinch candidats pella suprastanza
In venderdi saira s’han preschantats eir la candidata ed ils candidats per la su-

prastanza cumünala chi sun fin uossa cuntschaints. Quai sun Chasper Stuppan (fin uossa), Roman Federspiel (nouv), Leonora Leu-Fallet (nouv), Jachen Armon Pitsch (nouv) e Riet Scandella (nouv). Chasper Stuppan e Roman Federspiel candideschin in fuorma d’ün ticket da trais insembel cul candidat pel presidi cumünal Thomas Schadegg. Intant cha Roman Federspiel ha dit ch’el as retira da la candidatura, scha Thomas Schadegg nu vain elet sco persident cumünal, ha Chasper Stuppan amo laschè averta quist’opziun.

Tuot ils tschinch candidats uffizials pella suprastanza cumünala han preschantà lur böts e lur motivaziun da s’ingaschar politicamaing pel Cumün da Val Müstair.

L’elecziun da la suprastanza cumünala, dals commembers da la cumischium sindicatoria, dals commembers dals cussagl da scoula e da la cumischium da fabrica ha lö als 3 november, ün eventual seguond scrutin als 24 november. Fingì als 22 settember tschernan las Jauras ed ils Jauers la presidenta o il president cumünal. Ün eventual seguond scrutin ha lö als 13 october.

Commentar

Collavurar es essenzial

NICOLÒ BASS

Als 22 settember elegian las votantas ed ils vontats Jauers il presidi cumünal pels prossems quatter ons. A disposiziun per ün’ulteriura perioda d’uffizi as metta la presidenta cumünala actuala. Ella survain concorrenza da duos «collegas» commembers da la suprastanza cumünala chi vöglian eir surtour il timun. In venderdi s’han preschantats ils trais candidats. Intant cha la presidenta actuala voul cuntinuar culla lavur e realisar ils progets iniziats, voul ün oter candidat daplü visiuns e strategia. Il terz candidat invezza, ha fat valair plüssas jadas d’avair decis fallà in suprastanza. Evidaint dūrant tuot la discussiun ed ils differents temas es stat, cha la collavuraziun actuala tanter pēr nu funcziuna. Ils duos cuntracandidats han critichà ed attachà plüssas jadas la presidenta cumünala e la collavuraziun in suprastanza. Els han però invlidà, ch’els sun eir commembers da quist gremi e ch’els sun perquai üna part dal problem.

«Ün nov cumanzamaint» as giavüschin ils cuntracandidats e cul motto «Insembel inavant» candidescha ün trio politic per l’avegnir dal cumün da Val Müstair. Però quants cumanzamaints dovran las Jauras ed ils Jauers amo? Mincha quatter ons nu’s poja cumanzar da prüma, mincha jada nun es da bütter tuot sül cheu. Quai cha’l cumün da Val Müstair dovra es cuntinuità per realisar e finir ils progets iniziats. Per far quai nu ston tuot las commembras ed ils commembers esser dal listess avis – insomma brich – ma els ston esser buns da collavurar. E quai nu para actualmaing in quista constellaziun d’esser il cas. Perquai saraja il plü prudaint da cuntinuar culla via inchaminada ed impustüt da pussibilitar a la generaziun giuvna da’s partecipar a quist viadi. Güsta la runda cun las candidaturas pella suprastanza ha muossà: I dà in Val Müstair üna generaziun giuvna cun ideas ed iniziativa, üna generaziun chi’d es pronta da surtour respunsabilità ed impustüt pronta da collavurar.

nicolo.bass@engadinerpost.ch

Introdüer il bus da not

Engiadina Bassa In sia sezzüda da gövgia ha la Conferenza da presidentas e presidents da la Regiun Engiadina Bassa/Val Müstair (EBVM) trattà güsta plüs affars, sco ch’ella ha comunicà als mezs da massa: La conferenza ha prolungà per ulteriurs duos ons la cunvegna da prestaziun existenta pel gimnasi a l’Institut otalpin Ftan (IOF), fin dal 2026. La conferenza ha approvà il preventiv 2025 da la Regiun EBVM. Pro sortidas da var 4,71 milliuns francs resulta ün surplü d’expensas a charg dals cumüns da 2,62 milliuns. Las presidentas ed ils presidents cumünals han decis da propuoner al Chantun d’introdüer ün bus da not in Engiadina Bassa. Quel dess viagiar da not tanter las 01.00 e las 04.00 da Scuol in direenziun Martina, Zernez, Brail, Tarasp e Ftan.

La conferenza ha eir discus la contribuziun chantunala per l’avertüra dal bindel ultralarg (UHB) illa regiun. Il gremi renda attent cha mincha cumün stopcha uossa decider s’vess, scha e cura cha’l projet dess gnir realisà.

Implü ha realisà la Regiun üna cunvegna cul Muzeum Susch per ütilisar l’auditori da quel sco local per far nozzas. La conferenza ha proponü al Chantun d’eleger al manader da gestiun Arno Kirchen sco nov president d’urari da la regiun. Ils presidents e la presidenta sun eir gnüts infuormats davart las lavurs da sanaziun e la situaziun finanziala da la halla da glatsch Gurlaina. E sco ultim punct ha la conferenza eir amo tut cumgià da Rico Kienz chi va in pensiun la fin dal mais, davo esser stat ündesch ons manader da gestiun da la Regiun EBVM. (cdm/fmr)

Chiara e Fraja sun duos chognas chi protegian sü pro’l Lai da Rims in Val Müstair üna scossa da bescha. Per ün pēr dis nun hana protet plü a n’ingün. Uossa suna darcheu tuornadas.

La bell’ora da stà ha animà, sco chi para, eir a Chiara e Fraja dad ir in vacanze. «Las duos chognas da protecziun da nossa scossa da bescha han chattà üna foura illa saiv e sun s’vanidas», disch Johannes Fallet, el es respunsabel pellas scossas ed il fear da la clostra da Müstair. «Forsa vaiva il bescher gnü alch problem e dat ün sbraj», stübgia el, «uschè cha’ls chans vaivan l’impreschiun cha’l patrun nun haja plü jent ad els.» In mincha cas d’eiran ils duos chans tuot in üna jada davent.

Ün’excursiun in Italia

Il prüm han las duos chognas Chiara e Fraja fat üna ter spassegiada chi nu sarà statta be simpla: Dal Lai da Rims in Val Müstair, sur la Val Mora fin illa Valdentro tanter Livigno e Bormio in Italia sun las duos chognas chaminadas. Là tillas ha vis üna ciclista. Ella ha alarmà

al persunal dad üna pensiun da beschas a Sondrio.

Vacanzas pellas duos chognas

Ils impiegats da quista pensiun da beschas ha lura tschüf las fùgitivas da la Val Müstair e tillas manadas a Sondrio. Ils chans d’eiran munits cun chips. Sün quels d’eiran sù tuot las infuormaziuns davart ils chans, d’ingionder chi vegnan e chi chi sun ils proprietari. Fin cha’l persunal da la pensiun da beschas vaiva chattà oura co leger a man dal chip d’ingionder cha las chognas derivan haja dūrà ün pēr dis. «Quels apparats nu funcziu-

nan be da pais in Italia o in ün oter pajais dadour la Svizra», declera Johannes Fallet. Lura però ha’l tschüf la nouva ingio chi sajan. Cun ün permiss in tascha dal respunsabel dals chans chi d’eira quels dis eir el in vacanze es il fear da la clostra i a tour a chasa las duos fùgitivas. Ün’impiegada da la pensiun da beschas til ha fat ün cumplimaint dschond cha’ls chans sajan stats zuond bravs. «Daspö lur retuorn nun hana chaschunà ingüns problems», ha dit Johannes Fallet ad RTR cun ün surrier, «sco chi para nun hana plü dabsögn da dis libers e da vacanze.» (rtr/fmr)



Las duos chognas da protecziun Chiara e Fraja sun darcheu tuornadas da lur vacanze in Italia. fotografia: RTR

Arrandschamaint

Finissascha cun purtrets indigens

Zuoz Dals 23 avuost fin als 27 avuost ho que do a Zuoz ün’exposiziun dals artists indigens Floriana Flütsch (1955) e Roman Thöny (1958). Els expuonan già per la terza vouta insembel in Engiadin’Ota e muossan purtrets cun elemaints metallics da divers ge-

ners scu eir cuntredgias misteriusas e persunas. Quist mardi da las 14.00 fin a las 17.00 es la finissascha da l’exposiziun i’l stabilimaint dal pittur Greiner a Zuoz, chi’s rechatta illa zona industriela in vicinanza da la Resgia (Via Curtinella 10). (cdm/fmr)